



Broj: 01-50-1-15-59/18

Sarajevo, 21. 3. 2018.

ZAPISNIK
59. sjednice Predstavničkog doma
Parlamentarne skupštine Bosne i Hercegovine,
održane 21. 3. 2018.

Sjednica je počela u 10,15 sati. Odsutni su bili poslanici: Monika Tomić, Mensura Beganović i Fehim Škaljić.

Sjednici su prisustvovali članovi Vijeća ministara BiH, članovi Agencije za poštanski saobraćaj BiH i članovi Ureda ombudsmena za ljudska prava BiH.

Iz međunarodnih organizacija sjednicu su pratili predstavnici OHR-a, EUSR-a i Misije OSCE-a, te predstavnici britanske, američke i hrvatske ambasade u BiH.

U vezi sa izmjenama i dopunama dnevnog reda sjednice, predsjedavajuća Borjana Krišto napomenula je sljedeće:

S dnevnog reda, zbog toga što Zajednička komisija za ljudska prava PSBiH nije dostavila mišljenja, **skinute su**:

Tačka 11. Izvještaj o radu Vijeća nacionalnih manjina Bosne i Hercegovine za 2017. godinu, materijal broj: 05/7-50-19-555/18, od 21. 2. 2018. i

Tačka 13. Izvještaj o radu Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina ili drugi sud u skladu sa zakonom Bosne i Hercegovine za 2017. godinu, akt broj: 05/6-50-19-608/18, od 26. 2. 2018.

Dopunjene su tačke 4. i 8., te sada glase:

Tačka 4. Prijedlog zakona o izmjeni i dopunama Zakona o ombudsmenu za ljudska prava Bosne i Hercegovine, predlagač: Vijeće ministara BiH, zakon broj: 01,02-02-1-2568/17, od 30. 10. 2017., **sa Izvještajem Zajedničke komisije za ljudska prava PSBiH i**

Tačka 8. Prijedlog zakona o dopunama Zakona o sportu u Bosni i Hercegovini, predlagač: poslanik Mirsad Đonlagić, zakon broj: 01-02-1-647/18, od 2. 3. 2018., **s Mišljenjem Ustavnopravne komisije.**

Nakon uvodnih napomena, predsjedavajuća je otvorila raspravu o dnevnom redu. U raspravi su učestvovali: Senad Šepić, Jasmin Emrić, Nikola Lovrinović, Nikola Špirić, Borjana Krišto, Šefik Džaferović, Damir Arnaut, Aleksandra Pandurević i Momčilo Novaković.

Dopune dnevnog reda predložili su:

- Senad Šepić predložio je dopunu dnevnog reda tačkom koja glasi: „Informacija Vijeća ministara BiH o provođenju hitnih mjera i mogućnosti Bosne i Hercegovine po pitanju izbjegličke krize i priliva migranata u Bosnu i Hercegovinu.“
- Jasmin Emrić predložio je dopunu dnevnog reda tačkom koja glasi: „Zahtjev Vijeću ministara BiH da za prvu narednu sjednicu Predstavničkog doma Parlamentarne skupštine BiH izradi i dostavi na razmatranje informaciju sa zajedničke sjednice Vijeća ministara BiH i Vlade Republike Hrvatske, održane u Sarajevu 7. 10. 2017., o razgovorima i zaključcima u vezi s namjerom Republike Hrvatske da izgradi skladište i odlagalište radioaktivnog otpada, iskorištenih izvora i istrošenog nuklearnog goriva na lokaciji Trgovske gore, mikrolokacija Čerkezovac u općini Dvor, Republika Hrvatska.“
- Nikola Lovrinović predložio je dopunu dnevnog reda tačkom koja glasi: „Razmatranje Prijedloga zakona o izmjenama Zakona o krivičnom postupku Bosne i Hercegovine po hitnom zakonodavnom postupku, u skladu s članom 133. Poslovnika Predstavničkog doma Parlamentarne skupštine Bosne i Hercegovine, zakon broj: 01-02-1-791/18, od 21.3.2018.“
- Nikola Špirić predložio je dopunu dnevnog reda tačkom koja glasi: „Stanje sigurnosti u Bosni i Hercegovini povodom alarmantnih izjava ministra sigurnosti BiH Dragana Mektića.“

Predsjedavajuća je dala na glasanje prijedloge za dopunu dnevnog reda redosljedom predlaganja.

Prijedlog poslanika Senada Šepića za dopunu dnevnog reda *usvojen je* s 22 glasa “za” (iz Federacije BiH 15, iz Republike Srpske sedam), 11 “protiv” i četiri glasa “suzdržan”.

Prijedlog poslanika Jasmina Emrića za dopunu dnevnog reda *usvojen je* jednoglasno s 37 glasova “za” (iz Federacije BiH 23, iz Republike Srpske 14).

Prijedlog poslanika Nikole Lovrinovića za dopunu dnevnog reda *nije usvojen*. „Za“ je glasalo 10 poslanika (iz Federacije BiH četiri, iz Republike Srpske šest), 27 je bilo „protiv“ i bez glasova „suzdržan“.

„Za“ prijedlog poslanika Nikole Špirića za dopunu dnevnog reda glasalo je 16 poslanika (iz Federacije BiH sedam, iz Republike Srpske devet), 12 je bilo „protiv“ i devet glasova „suzdržan“. Predsjedavajuća je konstatirala da **nema potrebne entitetske većine**. O prijedlogu poslanika Nikole Špirića provest će se naknadno usaglašavanje u Kolegiju kao komisiji.

Predsjedavajuća je konstatirala da 59. sjednica Predstavničkog doma ima sljedeći

DNEVNI RED

1. Usvajanje Zapisnika 58. sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. Izvještaj komisije Kolegija o nastojanju za postizanje saglasnosti o Zahtjevu poslanika Amira Fazlića za razmatranje Prijedloga zakona o izmjenama i dopuni Zakona o krivičnom postupku Bosne i Hercegovine po hitnom zakonodavnom postupku, u skladu s članom 133. Poslovnika, broj: 01-02-1-668/18, od 5.3.2018.;
4. Prijedlog zakona o izmjeni i dopunama Zakona o ombudsmenu za ljudska prava Bosne i Hercegovine, predlagač: Vijeće ministara BiH, zakon broj: 01,02-02-1-2568/17, od 30.10.2017., s Izvještajem Zajedničke komisije za ljudska prava PSBiH;
5. Prijedlog zakona o izmjeni Zakona o plaćama i naknadama u institucijama Bosne i Hercegovine, predlagač: poslanica Borjana Krišto, zakon broj: 01-02-1-205/18, od 18.1.2018. (drugo čitanje);
6. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-1-377/18, od 27.2.2018. (prvo čitanje);
7. Prijedlog zakona o dopunama Zakona o prekršajima, predlagač: Vijeće ministara BiH, zakon broj: 01,02-02-1-531/18, od 19.2.2018. (prvo čitanje);
8. Prijedlog zakona o dopunama Zakona o sportu u Bosni i Hercegovini, predlagač: poslanik Mirsad Đonlagić, zakon broj: 01-02-1-647/18, od 2.3.2018., s Mišljenjem Ustavnopravne komisije;
9. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o dopunama Krivičnog zakona Bosne i Hercegovine (predlagač: poslanica Aleksandra Pandurević, broj: 01-02-1-1830/17, od 25.7.2017.);
10. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama Zakona o plaćama i naknadama u institucijama Bosne i Hercegovine (predlagač: Vijeće ministara BiH, broj: 01,02-02-1-2015/17, od 9.8.2017.);
11. Izvještaj o radu i finansijski izvještaj Agencije za poštanski saobraćaj BiH za 2017. godinu, broj: 01,02-16-1-587/18, od 26.2.2018.;
12. Izvještaj o radu Privremene zajedničke komisije oba doma Parlamentarne skupštine BiH za izradu prijedloga izmjena i dopuna poslovnika Predstavničkog doma i Doma naroda Parlamentarne skupštine BiH, broj: 01,02-50-19-683/18, od 7.3.2018.;
13. Razmatranje poslaničke inicijative Denisa Bećirovića koja glasi: „Na osnovu člana 8. Poslovnika Predstavničkog doma Parlamentarne skupštine BiH (‘Službeni glasnik BiH’, br. 79/14, 81/15 i 97/15), podnosim poslaničku inicijativu kojom se zadužuje Predstavnički dom Parlamentarne skupštine BiH da u roku od 30 dana od dana usvajanja ove inicijative obavi raspravu o Deklaraciji o genocidu Nezavisne države Hrvatske nad Srbima, Jevrejima i Romima tokom Drugog svjetskog rata, usvojenoj na sjednici Narodne skupštine RS-a“, broj: 01-50-1-544/18, od 20.2.2018.;
14. Informacija Vijeća ministara BiH o nemogućnosti TV prijenosa utakmica reprezentacije Bosne i Hercegovine, predlagač: poslanici iz Kluba SBB – Fahrudin Radončić, akt broj: 01-50-1-690/18, od 7.3.2018.;
15. Informacija Vijeća ministara BiH o provođenju hitnih mjera i mogućnosti Bosne i Hercegovine po pitanju izbjegličke krize i priliva migranata u Bosnu i Hercegovinu, predlagač: poslanik Senad Šepić, broj: 01,02,03-04-741/18, od 21.3.2018.;

16. Zahtjev Vijeću ministara BiH da za prvu narednu sjednicu Predstavničkog doma Parlamentarne skupštine BiH izradi i dostavi na razmatranje informaciju sa zajedničke sjednice Vijeća ministara BiH i Vlade Republike Hrvatske, održane u Sarajevu 7. 7. 2017., o razgovorima i zaključcima u vezi s namjerom Republike Hrvatske da izgradi skladište i odlagalište radioaktivnog otpada, iskorištenih izvora i istrošenog nuklearnog goriva na lokaciji Trgovske gore, mikrolokacija Čerkezovac u općini Dvor, Republika Hrvatska“, predlagač: poslanik Jasmin Emrić, broj: 01-50-1-790/18, od 21.3.2018.;
17. Davanje saglasnosti za ratifikaciju Sporazuma o grant sredstvima između Ministarstva za ljudska prava i izbjeglice Bosne i Hercegovine i Ministarstva vanjskih poslova Kraljevine Norveške za unapređenje sigurnosti žena i odgovora na rodno zasnovanu diskriminaciju i nasilje u Bosni i Hercegovini (BHZ-16-0004), broj: 01,02-05-2-557/18, od 21.2.2018.;
18. Davanje saglasnosti za ratifikaciju Sporazuma između Ministarstva odbrane Bosne i Hercegovine i Ministarstva nacionalne odbrane Narodne Republike Kine o vojnoj pomoći za Bosnu i Hercegovinu, broj: 01,02-05-2-606/18, od 26.2.2018.;
19. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Narodne Republike Kine o međusobnom ukidanju viza za nosioce običnih pasoša, broj: 01,02-05-2-713/18, od 8.3.2018.

Ad.1. Usvajanje Zapisnika 58. sjednice Predstavničkog doma Parlamentarne skupštine BiH

Predsjedavajuća je dala uvodne napomene i otvorila raspravu. Nije bilo prijavljenih.

Dom je, s 31 glasom „za“ (iz Federacije BiH 20, iz Republike Srpske 11), bez glasova „protiv“ i jednim glasom „suzdržan“, **usvojio** Zapisnik 58. sjednice Doma.

Ad.2. Komentari na odgovore dobivene na poslanička pitanja

Predsjedavajuća je podsjetila na to da su, u skladu s članom 170. Poslovnika, do ove sjednice Doma inicijative i pitanja u pisanoj formi dostavili poslanici:

- **Mirsad Isaković i Damir Arnaut** – postavili četiri pitanja predsjedavajućem Vijeća ministara BiH,
- **Nikola Lovrinović** – postavio pitanje rektorici Univerziteta u Tuzli,
- **Damir Arnaut** – postavio dopunska poslanička pitanja ministru vanjskih poslova BiH,
- **Damir Bećirović** – postavio pitanje Kolegiju Predstavničkog doma,
- **Saša Magazinović** – postavio pitanje predsjedavajućem Vijeća ministara BiH,
- **Mirsad Mešić** – postavio pitanje direktoru Agencije za lijekove BiH,
- **Hanka Vajzović** – postavila pitanja Vijeću ministara BiH, ministru sigurnosti BiH i direktoru Granične policije BiH.

Sadržaj postavljenih pitanja i inicijativa je sljedeći:

Mirsad Isaković i Damir Arnaut

Pitanja upućena predsjedavajućem Vijeća ministara BiH:

U Vašem svojstvu predsjedavajućeg Izvršnog obavještajnog odbora (Poglavlje III (c) i (d) Zakona o Obavještajno – sigurnosnoj agenciji BiH), molimo da nam dostavite sljedeće podatke:

1. broj zahtjeva upućenih od OSA-e prema sudskim organima za odobrenje prikupljanja informacija/podataka (Poglavlje VIII. c) Zakona o OSA-i) koji se odnose na izabrane i imenovane zvaničnike na svim nivoima vlasti u BiH (uključujući sve osobe koje imenuje/postavlja bilo koji organ vlasti ili za čije imenovanje bilo koji organ vlasti u BiH daje prethodnu saglasnost) tokom 2017. godine;
2. broj zahtjeva upućenih od OSA-e prema sudskim organima za odobrenje prikupljanja informacija/podataka (Poglavlje VIII. c) Zakona o OSA-i) koji se odnose na izabrane i imenovane zvaničnike na svim nivoima vlasti u BiH (uključujući sve osobe koje imenuje bilo koji organ vlasti ili za čije imenovanje bilo koji organ vlasti u BiH daje prethodnu saglasnost) tokom tekuće 2018. godine (počev od 1.1.2018. do danas);
3. statističke podatke iz prethodne dvije stavke dostaviti tabelarno, po godinama za koje se traže, s posebno istaknutom usporedbom između obuhvaćenog perioda u tekućoj 2018. godini i istovjetnog perioda u 2017. godini;
4. Molimo da ne dostavljate bilo kakve podatke operativne prirode, već isključivo opće statističke podatke kako je traženo.

Nikola Lovrinović

Pitanje upućeno rektorici Univerziteta u Tuzli:

„Izučavaju li se i kako svi službeni jezici u Bosni i Hercegovini na vašem Univerzitetu u Tuzli, odnosno u kojoj mjeri su zastupljeni u nastavnim procesima?“

Damir Arnaut

Dopunska pitanja upućena ministru vanjskih poslova BiH:

„U vezi s odgovorom na moja pitanja od 16.10.2017. koja se tiču objekta Ambasade i rezidencije BiH u Amanu (Jordan), koji ste dostavili 24.11.2017. (akt VMBiH br. 05-50-1-2667/17, od 24.11.2017.), postavljam dopunska poslanička pitanja kako slijedi:

1. S obzirom na to da u vašem odgovoru br.1. navodite da: „površina stambenog dijela objekta Ambasade BiH u Amanu je oko 220m², ko je donio procjenu/odluku koju navodite u vašem odgovoru br.3. da „Uvažavajući brojnost porodice ambasadora BiH u Amanu (broj članova šest – roditelji i četvero djece različite dobi i spola), stan u sklopu objekta Ambasade nije pogodan za smještaj višečlane porodice“?
2. S tim u vezi, koja je površina objekta u m², koji se, kako navodite u odgovoru br. 3., od 1.9.2015. za potrebe smještaja ambasadora BiH u Amanu iznajmljuje ... na adresi Al Hasheimiyeen Dair Ghbar, a za šta su osigurana budžetska sredstva?
3. Molim da dostavite sve akte Ambasade BiH Aman prema MVP-u BiH kojim se traži saglasnost za iznajmljivanje rezidencije, kao i sve druge akte koji se tiču ovog pitanja.
4. Molim da dostavite sve akte MVP-a BiH prema Ambasadi BiH Aman vezane za iznajmljivanje rezidencije, kao i sve druge akte koji se tiču ovog pitanja.
5. U vezi s vašim odgovorom br. 2. u kojem navodite da se „stambeni dio objekta od početka 2016. godine koristi za službene potrebe Ambasade BiH, jer su službene prostorije, u nivou suterena, usljed djelovanja vode i vlage oštećene i kao takve neuslovne za rad“, molim da dostavite sljedeće:
 - sve akte Ambasade BiH Aman prema MVP-u BiH koji se odnose na navedenu štetu
 - sve akte MVP-a BiH prema Amabasadi BiH Aman koji se odnose na tu štetu

- fotografije navedenih prostorija, odnosno navedene štete na njima
- informacije o razlozima za nastalu štetu
- informacije o svim preduzetim mjerama na saniranju te štete počev od njenog nastanka do danas.

Damir Bećirović

Pitanje upućeno Kolegiju Predstavničkog doma:

„Poštovani, molim Vas da mi u tabelarnom prikazu dostavite informaciju o izvršenim putovanjima poslanika i delegata PSBiH, sekretara domova kao i sekretara komisija PSBiH, za period 1.12.2014. do 15.3.2018. Informacija treba da uključuje domaća kao i putovanja u inozemstvo. Za sva putovanja molim Vas da mi navedete koje je prijevozno sredstvo korišteno, te ako se radi o avionu, za koju klasu je kupljena karta, koja je svrha putovanja te po čijem pozivu se putuje. Naravno, informacija mora obuhvatiti finansijske aspekte svakog pojedinačnog putovanja s pojedinačnom cijenom, te dnevnicama isplaćenim uz navedeno ime i dužnost svake osobe koja je putovala.

Saša Magazinović

Pitanje upućeno predsjedavajućem Vijeća ministara BiH:

„Da li Vijeće ministara BiH raspolaže informacijom o mogućnosti masovnog priliva migranata u Bosnu i Hercegovinu i migrantskim rutama koje idu preko BiH, iskazanoj namjeri migranata u drugim državama da se upute prema našoj državi, te ogromnom povećanju broja migranata u prva tri mjeseca ove godine u odnosu na raniji period te šta Vijeće ministara BiH preduzima i šta namjerava preduzeti kako bi se ublažile posljedice migrantske krize većih razmjera koja prijete Bosni i Hercegovini?“

Mirsad Mešić

Pitanje upućeno direktoru Agencije za lijekove BiH

„Molim da mi dostavite tabelarni prikaz odobrenih lijekova za bosanskohercegovačko tržište (koji sadrži ime lijeka, ime proizvođača i državu porijekla), u posljednje četiri godine, te da dostavite informaciju o tome kakav je bio stav Komisije za lijekove za svaki odobreni lijek.“

Hanka Vajzović

Pitanje upućeno Vijeću ministara BiH, ministru sigurnosti BiH i direktoru Granične policije BiH:

1. Ko je i na osnovu čega uopće odobrio reformu Granične policije BiH izvan okvira ili prije započinjanja ukupne reforme sigurnosnog sistema?
2. Da li je u VMBiH i u resornom ministarstvu analiziran i potom odobren navedeni prijedlog reforme?
3. Kako je riješeno pitanje nacionalnog sastava regionalnih centara i lokalnih jedinica, te pitanja hiperprodukcije generala?
4. Šta se u međuvremenu (u proteklih gotovo jednu i po godinu od kada je na poziv Glavnog ureda i direktora GP-a Komisiji za odbranu i sigurnost BiH „svečano i radno“ prezentiran projekat) desilo ili dešavalo – dokle se došlo u realizaciji ovog projekta: je li išta implementirano, te ako jeste, onda – šta; ako nije – zašto nije?
5. Koliko je budžetskih sredstava do sada odobreno i utrošeno u pripremi i realizaciji ovog projekta?“

Tokom sjednice poslanik Senad Šepić dostavo je pitanja u pisanoj formi:

Pitanje upućeno predsjedavajućem Vijeća ministara BiH:

“Da li se i na koji način u BiH može uvesti (praksa koju primjenjuju susjedne države poput Hrvatske) odluka/odredba za utvrđivanje kriterija, mjerila i postupaka za nadležne organe državne uprave, vladine urede i tijela, te druge javne institucije koje raspolažu sredstvima iz javnih izvora, za primjenu prilikom finansiranja i ugovaranja programa i/ili projekata od interesa za opće dobro koje provode udruženja /organizacije, kako bi takvim udruženjima omogućila kontinuiranu finansijsku pomoć i onemogućila gašenja organizacija koje su od vitalnog značaja za oboljele pacijente.”

Pitanje upućeno predsjedavajućem Vijeća ministara BiH i ministru sigurnosti BiH:

1. Koliko je stanje s prilivom migranata u BiH alarmantno i koliko BiH ima realnih mehanizama podrške i rješavanja ove problematike?
2. Zašto Akcioni plan koji je izrađen prije nekoliko godina još uvijek nije aktivan i da li je odgovor samo u nedovoljnom razumijevanju državnih struktura BiH u finansijskom smislu?
3. S obzirom na nepostojanje karantina, koliko su građani BiH izloženi zdravstvenim rizicima eventualnih virusnih i bakterijskih oboljenja koje mogu prenijeti migranti?
4. Koliko se građani u slučaju neregistriranih migranata izlažu pravno kažnjivom riziku pri pomaganju, posebno u dijelu privatnog smještaja a koliko pri naplati tog smještaja s obzirom na to da Ministarstvo sigurnosti BiH provjerava takve lokacije?

Predsjedavajuća je rekla da su do današnje sjednice dostavljeni sljedeći odgovori na poslanička pitanja:

- na pitanje **poslanice Mense Begović**, postavljeno u usmenoj formi na 57. sjednici, Vijeće ministara BiH prosljedilo je odgovor Ministarstva komunikacija i prometa BiH,
- na pitanje **poslanika Amira Fazlića**, postavljeno u pisanoj formi na 56. sjednici, odgovor je dostavila Uprava za indirektno oporezivanje BiH,
- na pitanje **poslanice Diane Zelenike**, postavljeno u usmenoj formi na 51. sjednici, Vijeće ministara BiH prosljedilo je odgovor Ministarstva vanjske trgovine i ekonomskih odnosa BiH,
- na pitanja **poslanika Safera Demirovića**, postavljena u pisanoj formi na 57. sjednici, odgovore je dostavila Uprava za indirektno oporezivanje BiH,
- na pitanja **poslanika Saše Magazinovića**, postavljena u pisanoj formi na 57. sjednici, odgovore su dostavile Agencija za zaštitu ličnih podataka u BiH i Agencija za nadzor nad tržištem BiH.

Dostavljene odgovore komentirali su poslanici Nikola Lovrinović i Hanka Vajzović.

Nikola Lovrinović izrazio je nezadovoljstvo zbog nedobivanja odgovora od gradonačelnika Tuzle, zatim zbog nedobivanja odgovora od BHRT-a i FTV-a na pitanje postavljeno prije više od godinu dana, te također zbog nedobivanja odgovora od Vijeća ministara BiH na inicijativu u vezi s objedinjavanjem druge i treće faze digitalizacije kada je u pitanju raspisivanje javnog tendera.

Hanka Vajzović izrazila je nezadovoljstvo zbog nedobivanja odgovora od Ministarstva komunikacija i prometa BiH.

Ad.3. Izvještaj komisije Kolegija o nastojanju za postizanje saglasnosti o Zahtjevu poslanika Amira Fazlića za razmatranje Prijedloga zakona o izmjenama i dopuni Zakona o krivičnom postupku Bosne i Hercegovine po hitnom zakonodavnom postupku, u skladu s članom 133. Poslovnika, broj: 01-02-1-668/18, od 5.3.2018.

Predsjedavajuća je dala uvodne napomene. Nije bilo rasprave.

S 19 glasova „za“, 11 „protiv“ (iz Federacije BiH tri, iz Republike Srpske osam) i šest glasova „suzdržan“, Dom je usvojio Zahtjev poslanika Amira Fazlića za razmatranje Prijedloga zakona o izmjenama i dopuni Zakona o krivičnom postupku Bosne i Hercegovine po hitnom zakonodavnom postupku, u skladu s članom 133. Poslovnika.

Predsjedavajuća je otvorila raspravu o Prijedlogu zakona. Nije bilo prijavljenih.

„Za“ usvajanje Prijedloga zakona o izmjenama i dopuni Zakona o krivičnom postupku Bosne i Hercegovine po hitnom zakonodavnom postupku, glasalo je 20 poslanika (iz Federacije BiH 19, iz Republike Srpske jedan), 10 je bilo „protiv“ i četiri glasa „suzdržan“. Predsjedavajuća je konstatirala da **nema potrebne entitetske većine**. O Prijedlogu zakona o izmjenama i dopuni Zakona o krivičnom postupku Bosne i Hercegovine po hitnom zakonodavnom postupku provest će se naknadno usaglašavanje u Kolegiju kao komisiji.

Ad.4. Prijedlog zakona o izmjeni i dopunama Zakona o ombudsmenu za ljudska prava Bosne i Hercegovine, predlagač: Vijeće ministara BiH, zakon broj: 01,02-02-1-2568/17, od 30.10.2017., sa Izvještajem Zajedničke komisije za ljudska prava PSBiH

Predsjedavajuća je dala uvodne napomene i otvorila raspravu. Nije bilo prijavljenih.

Bez glasova „za“, 29 glasova „protiv“ i pet glasova „suzdržan“, Dom **nije usvojio** negativan Izvještaj Zajedničke komisije za ljudska prava PSBiH, te je Komisija zadužena da izradi novi izvještaj o Prijedlogu zakona o izmjeni i dopunama Zakona o ombudsmenu za ljudska prava Bosne i Hercegovine, čiji je predlagač Vijeće ministara BiH.

Ad.5. Prijedlog zakona o izmjeni Zakona o plaćama i naknadama u institucijama Bosne i Hercegovine, predlagač: poslanica Borjana Krišto, zakon broj: 01-02-1-205/18, od 18.1.2018. (drugo čitanje)

Nakon uvodnih napomena, predsjedavajuća je otvorila raspravu. U raspravi su učestvovali: Maja Gasal - Vražalica, Dušanka Majkić, Mirsad Isaković, Senad Šepić, Hanka Vajzović, Salko Sokolović, Damir Arnaut, Zaim Backović, Milica Marković, Momčilo Novaković, Borjana Krišto, Nikola Lovrinović i Predrag Kožul.

Domu se obratio ministar finansija i trezora BiH Vjekoslav Bevanda.

U raspravi zaključke su predložili: poslanici Kluba SBB-a, Maja Gasal - Vražalica i Dušanka Majkić.

Poslanici iz Kluba SBB-a tražili su da se o njihovim prijedlozima zaključaka glasa pojedinačno.

„Za“ Prijedlog zaključka **br.1** poslanika iz Kluba SBB-a glasala su 22 poslanika (iz Federacije BiH 21, iz Republike Srpske jedan), 10 „protiv“, a dva su bila „suzdržana“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 22 glasa „za“, 11 glasova „protiv“ (iz Republike Srpske) i jednim glasom „suzdržan“, Dom **nije usvojio** predloženi zaključak, a on glasi:

1. *Predstavnički dom obavezuje Vijeće ministara BiH da osigura budžetska sredstva potrebna za primjenu ovog zakona na način koji neće dovesti do bilo kakvog smanjenja plaća, naknada niti bilo kojih drugih prihoda (konkretno: ukupnih primanja) bilo kojem zaposlenom iz sljedećih kategorija u institucijama BiH: vojna lica, policijski službenici, zaposleni obuhvaćeni članom 24. Zakona o plaćama i naknadama u institucijama BiH (NSS, KV, VKV i VŠS).*

„Za“ Prijedlog zaključka **br. 2** poslanika iz Kluba SBB-a glasao je 21 poslanik (iz Federacije BiH 20, iz Republike Srpske jedan), 11 „protiv“, a dva su bila „suzdržana“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 21 glasom „za“, 11 „protiv“ (iz Republike Srpske) i dva glasa „suzdržan“, Dom **nije usvojio** predloženi zaključak, a on glasi:

2. *Ako Vijeće ministara BiH odluči da osigura sredstva ili dio sredstava smanjenjem osnovice na obračun plaća, to može uraditi samo na način koji će dovesti do smanjenja plaća, naknada, drugih prihoda, odnosno ukupnih primanja samo sljedećim kategorijama: izabrani i imenovani zvaničnici, savjetnici te rukovodeći državni službenici.*

„Za“ Prijedlog zaključka **br. 3** poslanika iz Kluba SBB-a glasala su 22 poslanika (iz Federacije BiH 21, iz Republike Srpske jedan), 11 „protiv“, a jedan je bio „suzdržan“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 20 glasova „za“, 11 glasova „protiv“ (iz Republike Srpske) i tri glasa „suzdržan“, Dom **nije usvojio** predloženi zaključak, a on glasi:

3. *Predstavnički dom sugerira Vijeću ministara BiH da sredstva ili dio sredstava potrebnih za primjenu ovog zakona osigura iz sredstava tekuće rezerve, odnosno prestrukturiranjem budžetskih stavki.*

„Za“ Prijedlog zaključka poslanice Maje Gasal-Vražalica glasalo je 19 poslanika (iz Federacije BiH 18, iz Republike Srpske jedan), 14 „protiv“, a jedan je bio „suzdržan“. Predsjedavajuća je konstatovala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 19 glasova „za“, 14 glasova „protiv“ (iz Federacije BiH tri, iz Republike Srpske 11) i jednim glasom „suzdržan“, Dom **nije usvojio** predloženi zaključak, a on glasi:

1. *Vijeće ministara BiH će potrebna sredstva koja proizlaze iz Prijedloga zakona o izmjeni Zakona o plaćama i naknadama u institucijama BiH osigurati:*
 - *ukidanjem paušala svim izabranim zvaničnicima (poslanici/poslanice i delegati/delegatkinje),*
 - *iz tekuće rezerve,*
 - *iz sredstava namijenjenih za putovanja ovih izabranih i imenovanih zvaničnika.*

S 14 glasova „za“ (iz Federacije BiH šest, iz Republike Srpske osam), 17 „protiv“ i tri glasa „suzdržan“, Dom **nije usvojio** predloženi zaključak poslanice Dušanke Majkić, a on glasi: „*Odgada se izjašnjavanje o tački 5. dnevnog reda 59. sjednice dok Vijeće ministara BiH ne dostavi precizan obračun na koji način će se osigurati ukupna sredstva za povećanje plaća za 7126 vojnika i podoficira.*“

Poslanici Kluba Nezavisni blok podnijeli su amandman u plenarnoj fazi koji glasi:

AMANDMAN I.

„Član 1.“

U Zakonu o plaćama i naknadama u institucijama Bosne i Hercegovine („Službeni glasnik BiH“, br. 50/08, 35/19, 75/19, 32/12, 42/12, 50/12, 32/13, 87/13, 75/15, 88/15, 16/16, 94/16 i 72/17), član 14. (Platni razredi i koeficijenti za profesionalna vojna lica) mijenja se i glasi:

Platni razred	Čin	Koeficijent
1	Vojnik	1,29
2	Vojnik 1. klase	1,32
3	Kaplar	1,36
4	Vodnik	1,40
5	Stariji vodnik	1,46
6	Stariji vodnik 1. klase	1,52
7	Zastavnik	1,59
8	Zastavnik 1. klase	1,74
9	Potporučnik	1,90
10	Poručnik	2,00
11	Kapetan	2,10
12	Major	2,23
13	Pukovnik	2,47
14	Brigadir	2,96

S četiri glasa “za” (iz Federacije BiH tri, iz Republike Srpske jedan), 20 “protiv” i 10 glasova “suzdržan”, Dom **nije usvojio** predloženi amandman.

Zatim je Predstavnički dom, s 19 glasova “za” (iz Federacije BiH 14, iz Republike Srpske pet), 11 “protiv” i četiri glasa “suzdržan”, **usvojio** u drugom čitanju Prijedlog zakona o izmjeni Zakona o plaćama i naknadama u institucijama Bosne i Hercegovine.

Ad.6. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-1-377/18, od 27.2.2018. (prvo čitanje)

Nakon uvodnih napomena, predsjedavajuća je otvorila raspravu. Diskutirali su Nermina Kapetanović i Šemsudin Mehmedović.

S 22 glasa “za” (iz Federacije BiH 15, iz Republike Srpske sedam), devet “protiv” i tri glasa “suzdržan”, Dom **je usvojio** u prvom čitanju Prijedlog zakona o izmjenama i dopunama Zakona o radu u institucijama Bosne i Hercegovine.

Ad.7. Prijedlog zakona o dopunama Zakona o prekršajima, predlagač: Vijeće ministara BiH, zakon broj: 01,02-02-1-531/18, od 19.2.2018. (prvo čitanje)

Predsjedavajuća je dala uvodne napomene. Nije bilo prijavljenih.

S 20 glasova “za” (iz Federacije BiH 15, iz Republike Srpske pet), sedam “protiv” i sedam glasova “suzdržan”, Dom **je usvojio** u prvom čitanju Prijedlog zakona o dopunama Zakona o prekršajima.

Ad.8. Prijedlog zakona o dopunama Zakona o sportu u Bosni i Hercegovini, predlagač: poslanik Mirsad Đonlagić, zakon broj: 01-02-1-647/18, od 2.3.2018., s Mišljenjem Ustavnopravne komisije

Predsjedavajuća je dala uvodne napomene. U raspravi su učestvovali: Damir Bećirović, Mirsad Đonlagić, Damir Arnaut, Dušanka Majkić, Nikola Lovrinović, Zaim Backović i Momčilo Novaković.

S 14 glasova “za” (iz Federacije BiH tri, iz Republike Srpske 11), 16 “protiv” i četiri glasa “suzdržan”, Dom **nije prihvatio** negativno mišljenje Ustavnopravne komisije, te je Komisija zadužena da izradi novo mišljenje o Prijedlogu zakona o dopunama Zakona o sportu u Bosni i Hercegovini.

Ad.9. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o dopunama Krivičnog zakona Bosne i

Hercegovine (predlagač: poslanica Aleksandra Pandurević, broj: 01-02-1-1830/17, od 25.7.2017.)

Predsjedavajuća je dala uvodne napomene. Za članove Zajedničke komisije oba doma predloženi su: Aleksandra Pandurević, Mirsad Mešić, Lovrinović, Damir Arnaut i Mensura Beganović.

Predsjedavajuća je rekla da će se pojedinačno glasati o predloženim članovima, dok se ne imenuju tri člana, te dala na glasanje prijedlog za imenovanje Aleksandre Pandurević za člana Zajedničke komisije oba doma. Sa 20 glasova „za“ (iz Federacije BiH 15, iz Republike Srpske pet), osam „protiv“ i šest glasova „suzdržan“, Dom je imenovao Aleksandru Pandurević za članicu.

„Za“ imenovanje Mirsada Mešića glasalo je 17 poslanika (iz Federacije BiH 13, iz Republike Srpske četiri), 12 „protiv“, a pet je bilo „suzdržanih“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, sa 17 glasova „za“, 13 „protiv“ (iz Federacije BiH osam, iz Republike Srpske pet) i četiri glasa „suzdržan“, Dom je imenovao Mirsada Mešića za člana Zajedničke komisije oba doma.

Zatim je predsjedavajuća dala na glasanje imenovanje Nikole Lovrinovića za člana Zajedničke komisije oba doma. „Za“ imenovanje Mirsada Mešića glasalo je 16 poslanika (iz Federacije BiH 12, iz Republike Srpske četiri), 12 „protiv“, a šest je bilo „suzdržanih“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, sa 16 glasova „za“, 12 „protiv“ (iz Federacije BiH sedam, iz Republike Srpske pet) i šest glasova „suzdržan“, Dom je imenovao Nikolu Lovrinovića za člana Zajedničke komisije oba doma za postizanje identičnog teksta Zakona o dopunama Krivičnog zakona Bosne i Hercegovine.

Ad.10. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama Zakona o plaćama i naknadama u institucijama Bosne i Hercegovine (predlagač: Vijeće ministara BiH, broj: 01,02-02-1-2015/17, od 9.8.2017.)

Predsjedavajuća je dala uvodne napomene. Za članove Zajedničke komisije oba doma predloženi su: Mirsad Isaković, Maja Gasal -Vražalica i Predrag Kožul.

„Za“ je glasalo 20 poslanika (iz Federacije BiH), pet „protiv“, a devet je bilo „suzdržanih“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 20 glasova „za“, pet glasova „protiv“ (iz Republike Srpske) i devet glasova „suzdržan“, Dom je imenovao Mirsada Isakovića, Maju Gasal - Vražalicu i Predraga Kožula za članove Zajedničke komisije oba doma za postizanje identičnog teksta Zakona o izmjenama Zakona o plaćama i naknadama u institucijama Bosne i Hercegovine.

Ad.11. Izvještaj o radu i finansijski izvještaj Agencije za poštanski saobraćaj BiH za 2017. godinu, broj: 01,02-16-1-587/18, od 26.2.2018.

Predsjedavajuća je dala uvodne napomene.

S 19 glasova „za“ (iz Federacije BiH 13, iz Republike Srpske šest), pet glasova „protiv“ i 10 glasova „suzdržan“, Dom je **usvojio** Izvještaj o radu i finansijski izvještaj Agencije za poštanski saobraćaj BiH za 2017. godinu.

Ad.12. Izvještaj o radu Privremene zajedničke komisije oba doma Parlamentarne skupštine BiH za izradu prijedloga izmjena i dopuna poslovnika Predstavničkog doma i Doma naroda Parlamentarne skupštine BiH, broj: 01,02-50-19-683/18, od 7.3.2018.

Predsjedavajuća je dala uvodne napomene i otvorila raspravu. Nije bilo prijavljenih.

„Za“ Izvještaj o radu je glasalo 17 poslanika (iz Federacije BiH 13, iz Republike Srpske četiri), sedam „protiv“, a 10 je bilo „suzdržanih“. Predsjedavajuća je konstatirala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 17 glasova „za“, devet glasova „protiv“ (iz Federacije BiH sedam, iz Republike Srpske dva) i osam glasova „suzdržan“, Dom je **usvojio** Izvještaj o radu Privremene zajedničke komisije oba doma Parlamentarne skupštine BiH za izradu prijedloga izmjena i dopuna poslovnika Predstavničkog doma i Doma naroda Parlamentarne skupštine BiH.

Zatim je Dom, s 20 glasova „za“ (iz Federacije BiH 15, iz Republike Srpske pet), pet „protiv“ i devet glasova „suzdržan“, **usvojio** prijedlog Privremene zajedničke komisije oba doma Parlamentarne skupštine BiH za izradu prijedloga izmjena i dopuna poslovnika Predstavničkog doma i Doma naroda Parlamentarne skupštine BiH da prestane s radom.

Ad.13. Razmatranje poslaničke inicijative Denisa Bećirovića koja glasi: „Na osnovu člana 8. Poslovnika Predstavničkog doma Parlamentarne skupštine BiH ('Službeni glasnik BiH', br. 79/14, 81/15 i 97/15), podnosim poslaničku inicijativu kojom se zadužuje Predstavnički dom Parlamentarne skupštine BiH da u roku od 30 dana od dana usvajanja ove inicijative obavi raspravu o Deklaraciji o genocidu Nezavisne države Hrvatske nad Srbima, Jevrejima i Romima tokom Drugog svjetskog rata, usvojenoj na sjednici Narodne skupštine RS-a“, broj: 01-50-1-544/18, od 20.2.2018.

Predsjedavajuća je dala uvodne napomene i otvorila raspravu. Diskutirao je Mirsad Mešić.

„Za“ inicijativu je glasalo 20 poslanika (iz Federacije BiH 19, iz Republike Srpske jedan), 11 „protiv“, a tri su bila „suzdržana“. Predsjedavajuća je konstatirala da nema

potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 20 glasova „za“, 11 glasova „protiv“ (iz Republike Srpske) i tri glasa „suzdržan“, Dom **nije usvojio** poslaničku inicijativu Denisa Bećirovića.

Ad.14. Informacija Vijeća ministara BiH o nemogućnosti TV prijenosa utakmica reprezentacije Bosne i Hercegovine, predlagač: poslanici iz Kluba SBB – Fahrudin Radončić, akt broj: 01-50-1-690/18, od 7.3.2018.;

Predsjedavajuća je dala uvodne napomene i otvorila raspravu. U raspravi su učestvovali: Mirsad Đonlagić, Zaim Backović i Momčilo Novaković.

Poslanici iz Kluba SBB-a predložili su usvajanje zaključaka. „Za“ prijedlog zaključaka glasalo je 26 poslanika (iz Federacije BiH 22, iz Republike Srpske četiri), šest je bilo „protiv“, a dva su bila „suzdržana“. Predsjedavajuća je konstatala da nema potrebne entitetske većine. Kolegij kao komisija odmah je obavio usaglašavanje. Saglasnost nije postignuta. U drugom krugu glasanja, s 27 glasova „za“, četiri glasa „protiv“ (iz Republike Srpske) i tri glasa „suzdržan“, Dom **je usvojio** zaključke koji glase:

- 1. Zadužuje se Vijeće ministara BiH da za narednu sjednicu Predstavničkog doma PSBiH pripremi detaljnu informaciju o ovom pitanju, sa svim relevantnim detaljima i da predloži neophodne mjere kako se ovaj problem mora i treba regulirati.*
- 2. Zadužuje se Vijeće ministara BiH da od Konkurencijskog vijeća BiH pribavi detaljan izvještaj o navedenoj problematici.*

Ad.15. Informacija Vijeća ministara BiH o provođenju hitnih mjera i mogućnosti Bosne i Hercegovine po pitanju izbjegličke krize i priliva migranata u Bosnu i Hercegovinu, predlagač: poslanik Senad Šepić, broj: 01,02,03-04-741/18, od 21.3.2018.

Predsjedavajuća je dala uvodne napomene i otvorila raspravu. Nije bilo prijavljenih. Predsjedavajuća je konstatala da će se ova tačka svakako razmatrati na narednoj sjednici Doma, s obzirom da je Kolegij Doma materijal uputio nadležnoj komisiji.

Ad.16. Zahtjev Vijeću ministara BiH da za prvu narednu sjednicu Predstavničkog doma Parlamentarne skupštine BiH izradi i dostavi na razmatranje informaciju sa zajedničke sjednice Vijeća ministara BiH i Vlade Republike Hrvatske, održane u Sarajevu 7. 7. 2017., o razgovorima i zaključcima u vezi s namjerom Republike Hrvatske da izgradi skladište i odlagalište radioaktivnog otpada, iskorištenih izvora i istrošenog nuklearnog goriva na lokaciji Trgovske gore, mikrolokacija Čerkezovac u općini Dvor, Republika Hrvatska“, predlagač: poslanik Jasmin Emrić, broj: 01-50-1-790/18, od 21.3.2018.

Predsjedavajuća je dala uvodne napomene i otvorila raspravu. Diskutirao je Jasmin Emrić.

Dom je jednoglasno, s 34 glasa “za” (iz Federacije BiH 22, iz Republike Srpske 12), usvojio zaključak poslanika Jasmina Emrića koji glasi: *„Predstavnički dom zadužuje Vijeće ministara BiH da za prvu narednu sjednicu Predstavničkog doma Parlamentarne skupštine BiH izradi i dostavi na razmatranje informaciju sa zajedničke sjednice Vijeća ministara BiH i Vlade Republike Hrvatske, održane u Sarajevu 7. 7. 2017., o razgovorima i zaključcima u vezi s namjerom Republike Hrvatske da izgradi skladište i odlagalište radioaktivnog otpada, iskorištenih izvora i istrošenog nuklearnog goriva na lokaciji Trgovske gore, mikrolokacija Čerkezovac u općini Dvor, Republika Hrvatska.“*

Ad.17. Davanje saglasnosti za ratifikaciju Sporazuma o grant sredstvima između Ministarstva za ljudska prava i izbjeglice Bosne i Hercegovine i Ministarstva vanjskih poslova Kraljevine Norveške za unapređenje sigurnosti žena i odgovora na rodno zasnovanu diskriminaciju i nasilje u Bosni i Hercegovini (BHZ-16-0004), broj: 01,02-05-2-557/18, od 21.2.2018.

Predsjedavajuća je dala uvodne napomene i otvorila raspravu. U raspravi su učestvovali: Aleksandra Pandurević, Maja Gasal-Vražalica, Zaim Backović, Mirsad Isaković, Nikola Lovrinović, Momčilo Novaković, Damir Arnaut, Nermina Kapetanović i Dušanka Majkić.

Aleksandra Pandurević predložila je usvajanje zaključka koji glasi: *„Do naredne sjednice Predstavničkog doma odgađa se izjašnjavanje o tački 17. (Davanje saglasnosti za ratifikaciju Sporazuma o sredstvima granta između Ministarstva za ljudska prava i izbjeglice Bosne i Hercegovine i Ministarstva vanjskih poslova Kraljevine Norveške za unapređenje sigurnosti žena i odgovora na rodno zasnovanu diskriminaciju i nasilje u Bosni i Hercegovini.)“*.

S deset glasova “za” (iz Federacije BiH šest, iz Republike Srpske četiri), 19 “protiv” i pet glasova “suzdržan”, Dom **nije usvojio** predloženi zaključak.

Zatim je Dom, s 24 glasa “za” (iz Federacije BiH 19, iz Republike Srpske pet), osam glasova “protiv” i dva glasa “suzdržan”, **dao saglasnost za ratifikaciju** Sporazuma o grant sredstvima između Ministarstva za ljudska prava i izbjeglice Bosne i Hercegovine i Ministarstva vanjskih poslova Kraljevine Norveške za unapređenje sigurnosti žena i odgovora na rodno zasnovanu diskriminaciju i nasilje u Bosni i Hercegovini (BHZ-16-0004).

Ad.18. Davanje saglasnosti za ratifikaciju Sporazuma između Ministarstva odbrane Bosne i Hercegovine i Ministarstva nacionalne odbrane Narodne Republike Kine o vojnoj pomoći za Bosnu i Hercegovinu, broj: 01,02-05-2-606/18, od 26.2.2018.

Predsjedavajuća je dala uvodne napomene i otvorila raspravu. Nije bilo prijavljenih.

S 28 glasova “za” (iz Federacije BiH 19, iz Republike Srpske devet), bez glasova “protiv” i šest glasova “suzdržan”, Dom je **dao saglasnost za ratifikaciju** Sporazuma između Ministarstva odbrane Bosne i Hercegovine i Ministarstva nacionalne odbrane Narodne Republike Kine o vojnoj pomoći za Bosnu i Hercegovinu.

Ad.19. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Narodne Republike Kine o međusobnom ukidanju viza za nosioce običnih pasoša, broj: 01,02-05-2-713/18, od 8.3.2018.


Predsjedavajuća je dala uvodne napomene i otvorila raspravu. Nije bilo prijavljenih.

S 32 glasa “za” (iz Federacije BiH 20, iz Republike Srpske 12), bez glasova “protiv” i dva “suzdržana”, Dom je **dao saglasnost za ratifikaciju ratifikaciju** Sporazuma između Vijeća ministara Bosne i Hercegovine i Vlade Narodne Republike Kine o međusobnom ukidanju viza za nosioce običnih pasoša.

Sjednica je završena u 20,40 sati.

Sastavni dio Zapisnika je transkript 59. sjednice Predstavničkog doma.

SEKRETAR
PREDSTAVNIČKOG DOMA

Marin Vukoja


PREDSJEDAVAJUĆA
PREDSTAVNIČKOG DOMA

Borjana Krišto

